

## Cari amici

I é già 55 ani, sto an, che vegne te sta val de San Martin par recordarme, pregar e gòder de la beleza del *Stien*. Saràla la ultima?

Recordarme de tuti cuei che i é gnesti ten sta val e su pai sviert de ste montagne, a cavar fora an poc de beneser par tirar avanti la fameia : cuant sudor e cuanta fadiga! Arcuanti i ghe à lasà anca la vita: cualchedun par via den incidente sul laoro e altri par colpa de na guera; ma i nostri veci e i meno veci i gnea anca, qualche olta, par divertirse, a la caza e a la pesca ; ma sempre co la speranza de portar a casa qualcosa da magnar.

La prima olta che son vegnest l é stat del 51, l an che son stat fat prete a Perigueux in Francia, dove i mei i ea emigrà del 25, in zerca de laoro e de pan.

Del 51 dunque, an nan dopo la mort de Giulio Tatto, cascà do da la montagna entro sora l « Sas sbregà » par portar casa an poc de fen, son gnest col maestro Luigi Tatto, fiol de Giulio, e arcuanti da Lasen, Vignui, Lamén, Pren, dir la mesa sul posto onde che l era cascà do e pregar par tuti cuei che i a lasà an poc de la so vita - e anca tuta - te la nostra val.

Cualche an dopo, vista la dificoltà del posto, on tacà a spostarse pian pianet pì infora, fin che son rivadi qua: « al Santo »; e i alpini de Villabruna i se a dat da far par rangiar sto posto così meravigliosamente come se pol vederlo e goderlo. Che i sia ringraziadi.

E tutti i ani da lora vegnon entro « al Santo », la domenega prima de feragosto, a far festa. Festa parché se se ritrova insieme, na olta al an; anche se, an nan dopo l'altro, zerti i ne à scampà. Ma la é così la vita...

Festa parché se se ritrova sot al sguardo del Signor par render grazia par El, con El e in El par tut quel pasà de amor, qualche olta doloroso, che i nostri veci i à vivest par noi; render grazia te sto posto così bel, in medo a na natura meravigliosa, e come sfondo l cant del Stien ; anche se mi nol sente pì !

Cuesta Eucharistia che ston celebrando, ne invita, a travers le realtà ben precise de la nostra vita a alzar l nostro pensier verso le realtà celesti che ne ofre l Signor ; e ste realtà le da l vero senso a la nostra vita.

On sentist te la prima letura la testimonianza de Elia : l Signor l é sempre pronto a vegnerne in aiuto, par iutarne a ndar avanti, anca se la strada qualche olta la é longa e dura.

Te la seconda letura San Paolo ne dis che Lu stes le vegnest, in Gésu, te la nostra umanità par mostrarne la strada verso la felicità e vèrderla.

Al Signor al ne mostra la strada, ma l ne da anche cuel che ne ocòr pa ndar avanti se olòn; parché l Signor no l é un « da vesin » de le nostre vite, al é la Vita.

Al é Lu che ne fa viver! e depì, al é « bon »: « *saiè e vederè : l Signor l é bon* ».

El ne dis : « *se olé er la Vita, magnè la me Parola, magnè la me Carne, beé al me Sangue* ».

Parola, Carne, Sangue : l é l'Amor del Padre che ne vien dat in Jesu-Christo e che impasta, dì dopo dì, col so amor, la nostra esistenza sot la spinta de lo Spirito Santo.

I é cuesti i valor che i nostri veci, non senza qualche mancanza, i à vivest par noialtri, e la é sta strada che i ne à insegnà. Cosa ghen one fat?

Cari amici, forsi, in sta festa, l Signor, tra medo i nostri veci, l ne fa segn e l ne invida a vardar l nostro modo de far del dì d'incoi e forsi l saria content de vederne a cambiar an poc qualcosa ; e ston seguri che l Signor al é sempre pronto a darne quel che on de bisogn pa ndar avanti su la strada de la nostra vita e caminarla con coraio, serenità e pace profonda tel cor.

E podon star siguri che i nostri veci, lori che dè i é in pien Amor del “ Paron Grando”, come che disea Don Giulio Gaio, i se da da far parché anche noialtri one la oia e la volontà de eser fedeli al nostro batedo.

Eser fedeli al nostro batedo, l é meterse in strada drio al Signor, su la strada del Amor; sta strada qualche olta la diventa an troi sviert e pien de difficoltà, che fa anca sudar, ma recordonse che anca Lu, an zerto doba da sera, l à sudà an sudor de sangue n tel ort de Getsemani par vèrderne sta strada del Amor.

E alora, se vardon Lu, l Signor (come ne invitea con insistenza Giovanni Paolo Secondo ) - e co l aiuto de la preghiera dei nostri veci - podon ndar avanti anche se qualche olta se macòn an poc cascando, ingambarandose t'en qualche sas o roa del nostro egoismo e orgolio:

“*Lèvete su e vienme drio*” al é sempre pronto a dirne l Signor; e anca l ne da na man par tirar su quella musa pesante che qualche olta la é la nostra vita.

E ston seguri che pì ndaron in su su la montagna AMOR, pì la vista la sarà bela e pì ne vegnerà l coraio e la forza pa ndar avanti sorpasando tute le difficoltà.

E an dì, pì o meno da vesin, saron tuti insieme a la tola del Amor, su la montagna del Signor. Così sia.